



## PCN ta kuminsá ku modernisashon i ampliashon di Scout's Place na Saba

Ku revelashon di e bòrchi di proyekto ku riba dje Scout's Place den su forma nobo, su propietario Pensioenfonds Caribisch Nederland (PCN) a duna inisio ofisial na renovashon di e estableimentu akí.

Despues ku PCN a kumpr'é na 2020, a traha ku hopi atenshon riba un plan di renovashon i ampliashon kompleto, ku e meta pa laga Scout's Place floresé atrobe. E proyekto di renovashon, bou di supervishon profeshonal di Michael Bacon di Alite B.V., lo dura mas òf ménos 1,5 te 2 aña. PCN, despues di un prosedura di destaho amplio, a otorgá e enkargo di konstrukshon na QBR Joint Venture B.V., un kolaborashon entre un kontratista sabano i un kanades.

Gobièrnu di e isla for di inisio a risibí e plannan di desaroyo pa Scout's Place ku entusiasmo. Diputado di Turismo Bruce Zagers: "E plannan pa modernisá i amplia e edifisio ikónico akí ta hopi impreshonante. Scout's Place semper tabata importante pa Saba, no solamente pa turismo, pero tambe komo parti di nos patrimonio kultural. Desaroyo di e edifisio akí sigur lo duna un impulso importante na ekonomia di nos isla i na nos produkto turístiko. Ta hopi alentador pa mira ku ta desaroyá tipo di proyektonan asina, kaminda ta duna prioridat na empleo lokal, enkanto i arkitektura tradishonal."

PCN su meta ta pa krea un futuro nobo i briante atrobe pa Scout's Place, ku ta kuadra ku e espektativanan di awendia di e wéspetnan. Harald Linkels, presidente di direktiva di PCN, ta entusiasamá ku e plannan. "Banda di un rendimentu positivo ku kier logra pa e fondo, pa PCN ta hopi importante ku ta duna un kontribushon ekonómiko i sosial na komunidad di Saba ku e renovashon akí. E eskoho pa un kontratista lokal ta duna mas forza na nos intenshonnan."

### Operashon

Una bes ku e ta finalisá, Scout's Place 'nobo' lo konsistí di 30 kamber di hotèl, 8 unidat ku por ser usa komo kamber di famia òf kambenan pa estadia largu, un restaurant presioso i bar i dos unidat komersial. Durante e fase di konstrukshon PCN aktivamente ta bai buska operadó- òf impresarionan ku ta aspirá un papel den en estableimentu nobo.



### **Meskla di invershon**

PCN ta duna hopi balor pa, banda di su invershonnan riba merkadonan finansiero internashonal, invertí tambe lokalmente riba e islanan BES. A reservá un parti di kapital total pa hasi esaki.

